


Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
4366/A





Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
4566/A




Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
4566/A





Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
4566/A


4566

A









Handwritten: 9.417.54
66617

VIA SAPI-
ENTIAE TRI-
VNA

HENRICI NOLLII, THEO.
sophi & Medici, Professoris
Steinfurtensis.

EDITA

ab

ANASTASIO PHILARETO
COSMOPOLITA.

Ludovicus Vives.

*Qua in iuventute elato supercilio putabam esse The-
sauros in Philosophia, iam conversus & senex, video
vix stercora esse, & tantum remoras vitae pie, studi-
orumq; necessariorum fuisse.*

A N N O
Sapiente IVDICE, triV Mphat Veritas:

Sap. 7. v. 25.

Sapientia est vapor virtutis DEI: & emanatio quaedam est claritatis omnipotentis DEI sincera. Et ideo nihil inquinatum in eam incurrit &c.

Proverb. 2. v. 6.

DOMINVS dat Sapientiam, & ex ore eius prudentia & scientia.

Sapientia ipsa, ubicunq; prodit, suam ipsius vestem ex innata indole sibi conficit: Non opus habet ut ab Aristotele vestem mutuetur.

H. N.



ILLVSTRI ET GE-
neroso Domino,

Dn. NATHANI SLUSIO &c.

Baroni Gallo literatissimo,

ANASTASIUS PHILARETUS

COSMOPOLITA,

*Salutem ac observantiam per-
petuam.*



Ermo nobis variſc-
pè & multiplex fuit,
SLUSI præclarissime,
in Muſarum Parnaf-
ſo Lugduni Batavorum, de ex-
cellentissimo Theſopho &
Medico Henrico Nollio, Pro-
feſſore Steinfurtenſi. Is his die-
bus in natali urbe Hamburgi,
honorificentiffimâ ſuâ præſen-
tiâ, eruditiffimisq; de rebus di-
vinis & humanis colloquiis in-
effabili me planè lætitiâ perfu-

A 2

dit

dit, & in discessu suo non uno
scriptorum suorum ineditorū
munere ornavit. Ex quorum
censu aureus hic, quem ad te
dirigo libellus, ut per te in alio-
rum veræ & æternæ incarnatæ
Sapientiæ cultorum manus de-
veniat, quo vix alius auctoris
nostri quispiam ullibi vivit a-
mantior, & in istâ ætate ac for-
tunâ mysticæ Theologiæ ac
Philosophiæ peritior. Cujus
uni heroico pectori, nos nostra
que magis placere studemus,
quam toti degeneri populo.
Nunquā optima pluribus pla-
cuerunt, argumentum pessimū
turba est. Nisi me omnia fallūt,
non multum rogandus eris ut
labores nostros patrocinio tuo
adversus lividorum morsus tu-
caris,

earis, cum non ignoremus te,
tua sponte id facturum, hoc
tantum submisè oro, ut me
quem semel singulari tua co-
mitate, nullo meo merito, inti-
mæ admissiois amicum con-
stituisti, porrò eodem jure uti,
frui sinas, ita te summus J E-
HOVAH salutis publicæ bo-
no diu mortalibus interesse pa-
tatur, tuaq; vota prosperimo
successu beet. Vale dulce de-
cus & præsidium meum, me-
mor nostri.

*Dab. Cursim Lunab. A. ara
Christiana M. DC. XX.
Mens. Septemb.*

IN VIAM SAPIENTIÆ TRIU-
nam ab Henrico Nollio solis doctrinæ
filiis consecratam Epi-
gramma.

Sit quibus indaganda modis, sit & unde pe-
tenda.

Lux Sophia; paucis, prôdolor! ista patent.
Inveterata quidem jam cepit opinio multos
Quod Sophia doceant dogmata vera Scholæ;
Unde catervatim Sophia studiosa juvenus,
Publica Musarum castra Scholasq; petit.
Sed gravis est error: nam vera scientia rerum
A patre caelesti, non aliunde venit.
Unicus hic Sophia fons est, qui flumine trino,
Suaviter, igne crucis, torrida corda rigat.
Est rudis, ex isto nisi fonte quis hauserit undas,
Eximiè doctum se licet esse putet.
Stulta quidem passim cæci Sapiaientia mundi
Regnat, & elatum tollit ad astra caput.
Una tamen superest & inevitabilis hora,
Temporibus finem qua Deus hisce dabit.
Tunc sincera suum sparget Sapiaientia lumen,
Quod nunc stultitiâ prædominante latet.
Vos igitur juvenes, quibus est Sapiaientia cordi,
Aeterna veram discite mente viam.

Hac

*Hac semel inventa; feliciter atq; labore
Jam facili reliquum conficietis iter.
O benè de vobis meritum, vestroq; favore
Perdignum! qui vos hanc docet ire viam.
Nollius ecce docet, tamē haud ignarus, Athenis
Hæc cathedralitis non placitura Sophis:
Nam genus hoc hominum, quod non nisi grati-
dia spirat,
Magnificæ pompam garrulitatis amat,
Fucatoq; studet potius splendore probari
Mundo, quàm vera simplicitate, Deo.
Candide sed Lector, facies abjecta libelli
Plus in se, primò quàm videatur, habet.
Ne modò præcipiti damnes ignota furor,
Quis scopus? qua sit mens genuina, vide.
Quod si dante Deo, fuerit tibi cognita praxis;
Grates Autori, Lector amice, feres.*

URBANUS GELNICIUS.

Vere

Vero Sipienti S:

UT tripus aureus inventus ex Delphica Phœba-
dos responso Sipientissimo viro fuit assignatus:
ita ego hanc viam Sipientie triunam, tibi Sipi-
enti, ubicunq; locorum es consecro. Mathesin cum ru-
dimentis pietatis, & linguas Græcam, Hebraicā & Lati-
nam primum docendas, & in iis tyrones Sipientie ex-
ercendos usq; dum ipsorum iudicium maturaverit, 2.
Viam Sipientie triunam descendam & sequendam, &
3. demum Sipientium libros ac commentaria legenda
esse volo. Tu cense, & si qua in parte hac methodus ti-
bi emendanda videtur, modestè mihi illud, aperi. Te
solum tanquam ducem sequar, & te quoq; ob tuam fra-
ternam admonitionem honore mactabo. Vale. Dabam
Steinfurti è Museo 6, Feb, Anno 1620.

HENRICUS NOLLIUS.

Errores operarum

In quibusdam exemplaribus legendum B. 3. Col. 2. l. 19. nos-
ses. C. Col. 2. l. 9. legens. C. 3. Col. 1. 8. lin. haurire. D. Col. 2. l.
3. abyss. D. 6. c. 2. l. 10. supposititi D. 7. l. 4. supposititiis h.
6. venenum c. 2. l. 18. haurit D. 8. c. 1. l. 12. Matæologas, &c.



PRÆFATIO IN VIAM SAPIEN- tiæ triumam.



Extra Controversiam
est, sapientiam tanto es-
se in precio apud homi-
nes, ut vel omni studio
eam prosequantur vel
saltem haberi velint studiosi ejus.
Paucissimi tamen sapientiam inve-
niunt, i. quia plurimi eam in homi-
nū scriptis quærunt, quæ ne micam
veræ sapientiæ habēt 2. quia viā ve-
ram ad sapientiæ sincerioris funda-
mentum deducentem negligunt 3.
quia sapientū adventū expectant, &
expectando nihil inveniūt. His no-
vissimis temporib⁹ fratres R. C. edi-
derunt famam & Confessionem fra-
ternitatis, atque in iis magisteria &
mysteria naturæ stupenda promit-
tunt. Ea autem mysteria vel absq;
B fra-

fratrum illorum explicatione & institutione explorari possunt, vel ad eorum magnalium investigationem necessarium est, ut in fratrum veniamus notitiam. Hoc si verum esset, Paracelsus Magnus ille Germaniae Philosophus ea mysteria, quae ipsi praedicant, nescivisset: quippe fratres illos non cognovit. At plura ejusmodi arcana, quae fratres R. C. praedicant, exquisitè scivit, id quod etiam ipsi fratres non negant. Addo quod ante fratrum R. C. ordinem talia naturae miracula prorsus incognita fuissent, si à fratrum istorum institutione penderet eorum secretorum revelatio. Merito ergo statuo, Sapientiae profundioris magnalia sciri & investigari, etiam si fratres planè ignorentur, Frustrà ergo quaerimus Sapientes, sine quibus vera Sapientia facile acquiri potest. Homines segnes & otio dediti, qui tantum ex fratribus illis sapientiam necessario discendam esse arbitrantur, expectando marcescunt & nihil agendo

gendo nihil discunt sibi persuaden-
tes, se in viam veræ Sapientiæ in-
quirere non debere, quia alii eam
dilucidè exposituri sint, ut absque
labore hoc tempore quilibet ea po-
tiri queat. Aber es wird dir keine
gebratene Taube ins Maul fliegen:
id est.

*Non tibi per ventos assa columba
venit.*

Præterea fratres R. C. non in-
tendunt alios eò permovere, ut ip-
sorum adventum tantum exspe-
ctent otiosi, & de Sapiencia conse-
quenda nihil sint solliciti, sed ut a-
gnoscant vulgarem Philosophandi
rationem esse insufficientem, im-
perfectam & planè rejiciendam,
Theologiamque Symbolis homi-
num & Confessionibus expressam,
non esse solidum fundamentum, in
quo cognitio rerum divinarum
fundari debeat: sed dari profun-
diorem Philosophiam & Theolo-
giam, quàm eam, quæ à diversis
sectis in varias opiniones inani

altercandi studio distracta est, ac
proinde decere studiosos, ut, si quam
occasionem aliunde captare pos-
sint, occultioris sapientiæ mysteria
rimentur, & his intellectis, verorum
Philosophorum commercio fruan-
tur. Tu ergo, qui sapiens fieri deside-
ras, fratres R. C. esse fratres sapientes
permitte, eos ne quære, nec expecta,
studium sapientiæ interim negli-
gens. Si contingeret, ut nullum fra-
trem per totius vitæ cursum videres,
frustrà quæreres, frustrà expectares
& sic sapientia excideres; quam ta-
men reportare potuisses, nisi expe-
ctando in otium delapsus consultò
eam negligere voluisses. Meditare
verò ipse viam veræ sapientiæ, in-
gredere eam & naturam ex libro tri-
uno Catholico philosophicè & the-
osophicè explora, dubio procul in
sapientum familiaritatem opinio-
ne citius pervenies. Ne autem de
viæ ad veræ sapientiæ solidum fun-
damentum deducentis obscuritate
conqueraris, hoc in tractatu I. er-
rores

rores circa viam fundamenti sapi-
entiae indicem evolvam 2. Viam tri-
uinam, quæ solidum sapientiae fun-
damentum ostendit, perspicue pro-
ratione talenti divinitus mihi dati,
Deo iuvante, exponam, & 3. Quis
dignus sit ut per viam istam triunā
in sapientiae sanctuarium introeat,
& quo fine & quando sapientum li-
bri sint legendi, describam. Deus qui
est fons omnis boni, gubernet men-
tem & calamus meum, Amen.

C A P. I.

*ARISTOTELIS, PLATONIS,
Scholasticorum, & aliorum hominum
qui eos sectantur Scripta non esse vi-
am, quæ Sapientia solidum fun-
damentum monstret.*

QUo in loco sint scripta Ari-
stotelis, Platonis, Scholasti-
corum & aliorum, qui eos imitan-
tur, in propatulo est. Error tamen
non exiguus est, arbitrari, ea scripta
esse viam ad solidum veræ Sapientiae
fundamentum deducentem. Pri-

B 3

mum

mum Sapienciam ipsam non conti-
nent. Deinde corticem & umbram
potius, quam nucleum & corpus ex-
ponunt. In terminorum fictorum
discussione, explicatione & aliorum
dictorum refutatione vitam & ani-
mam habent. Autores eorum scri-
ptorum ambagibus delectati in la-
byrinthum devolvuntur, & ex ver-
borum lenocinio Sapientes haberi
volunt. Quandiu per altercationes
ad Sapientiae fundamentum quis ad-
spirat, tandiu ab ea aberrat. Falsi-
tas variis & per pluribus tegumen-
tis opus habet, ne agnoscat: veri-
tas simplici incedit apparatu. Om-
nium Scholasticorum formalita-
tes, hæceitates, menseitates, ligne-
itates &c. quamvis nosces, nihil ta-
men esset, quod scires. Curiosus in
verbis res ipsas vix vel raro attingit.
De Universalibus metaphysicus mi-
serè disputat: Hic ea esse entia realia
absque operatione mentis in rerum
natura existentia; ille entia ratio-
nis opinatur. Ad stipulare, utri volu-
eris,

eris, & eandem obtinebis felicita-
tem. Ut ut hoc sit, isti tamen alter-
catores utrinq; se palmam Sapien-
tiæ reportasse sibi persuadent. Hæ-
rentes circa vanas & inutiles quæsti-
ones prætereunt necessaria & utilia.
In vanitatibus gloriam quærunt, in
quibus tamen ne umbra gloriæ est.
Mundo placent, quia ipse vanus &
ab intimis secretissimisq; Sapientiæ
Thesauris est remotissimus. Æter-
nam Sapientiam demonstrare ne-
queunt, quia Sapientiam in exter-
nis positam esse litigiis cum stulto
mundo stultè opinantur. An ergò
Aristoteles, Plato, Scholastici & eo-
rum asseclæ prorsus legendi non
sunt? Hoc dicere non ausim: Multa
enim in iis reperiuntur hinc inde ta-
men parcè dispersa, quæ veritati sunt
conformia: Sed in scriptis eorum
veræ sapientiæ fundamentum col-
locandum esse pernego. Consulti-
us est, ut, si meliores autores, qui de
vera sapientia scripserint, habemus,
eos consulamus, diligentius lega-

Matth 6. 33.
Quarite pri-
mum regnū
Dei. & reli-
qua adjicien-
tur vobis.

mus, & ex iis Sapiētiā discamus.
Præstantius semper præferendum,
illi, quod minus est præstans. Cum
ergo nobis sacro sancta sint Biblia,
quæ tantum sapiētiæ thesaurum
nobis aperiunt, quantus in nullis A-
ristotelis & assecularum ejus libris of-
ferri potest, satius est præterire &
abjicere ethnicorum, illorumq; qui
Ethnicorum vestigiis insistent, lite-
raria monumenta, ut ne in alienis
occupati potiora expiscari nequea-
mus. In mundanis artificiis nihil
solidi percipitur, nisi quis objectum
artis suæ studiosè tractaverit, alie-
naque planè posthabuerit. Multo
majori diligentia veræ Sapiētiæ
studiosi noctesq; diesq; S. S. Biblia,
omissis aliis versare debent, ut soli-
dum in sapiētia fundamentum po-
nere possint. Quia in unis sacris li-
teris Sapiētiæ fundamentum obti-
neri potest, in Ethnicis & Scholasti-
cis scriptoribus illud quærendum
non est. Stultum est, per ambages
quærere, ad quod rectâ faciliè perve-
nire

nire possumus. Vita nostra brevis
est. Qui potissimam ejus partem in
vanitatibus insumunt, vix vel raro
ad sapientiæ fores admittuntur, ne-
dum per fores in Sapientiæ Sanctu-
arium ingrediuntur.

C A P. II.

*NEC IN PARACELSI, NEC
in Weigeli, nec in ullius Theologi, Phi-
losophi, cuicunque Sectæ addictus fu-
erit, imò nec in meis ipsius scriptis es-
se fundamentum Sapientiæ quaren-
dum & ponendum.*

PARacelsus Vir magnus est, &
Philosophiâ meo judicio dex-
terius explicavit, quàm universa A-
ristotelicorum turba. Weigelius di-
vinioris Sapientiæ studiosissimus di-
vina planè & nullo unquam ævo in-
termoritura manuscripta, ingenii
sui excellentia monumenta, post se
reliquit. Et sunt prætereos adhuc
magni Theologi & Philosophi, qui
aut à secta liberi sunt, aut certæ ali-
cui sectæ suum dederunt nomen.

B s

Eo

Eorum omnium, quales & quanti
sint, scripta non habentur duces &
viæ ad Sapientiæ solidum funda-
mentum deducentes, id est, tanti æ-
stimari non debent, ut in iis funda-
mentum Sapientiæ quæratur & col-
locetur, idque ea de causa, quia ex i-
stis autoribus homo præiudicio im-
buitur, & ea, quæ in via Sapientiæ
triuna offeruntur, ad suum præiudi-
cium, conceptaq; inde principia de-
torquet ita ut sanum iudicium de
rebus ferre nequeat. Magni & ce-
leberrimi isti viri omnem Sapien-
tiam ex divino fonte non exhausserunt,
nec certis libris includere potuerunt.
Et in hoc mundo vix ulli homini
contingit hæc felicitas, ut semper
absque errore loquatur, scribatve,
vel sine errore intelligatur. Imò
impossibile est ut Sapiens semper ea
facilitate id quod ipsi in mentem
venit, pronunciet, quò abs quovis
debitè & dilucidè percipiatur: Sapi-
entiæ enim Thesauri sunt in exhau-
sti & persæpè adeò abstrusi & pro-
fundi

fundi, ut in phrasibus usitatis &
maximè notis homini innotescere
vix vel rarò possint. Quicunque er-
gò secundum principia, per præju-
diciū ex alicuius Sapientis scri-
pto oborta de omnibus judicare sibi
proponit, in errorem prolabitur &
alios secum in inextricabiles falsita-
tum labyrinthos abducit. Ea,
quæ vulgaria sunt, seu sub vulgi ca-
ptum facilè cadunt, reconditoris
literaturæ semina non sunt. An-
tiqui Philosophi figuris, parabolis
& ænigmatibus diviniorem Sapi-
entiæ viam occultarunt. Sacer-
dotes tum apud Gentiles, tum a-
pud Judæos & Christianos sua
habuerunt Sanctuaria, quæ nemo
intrare dignabatur, nisi ille, qui in
Sacerdotii ordinem post varias pro-
bationes & examinationes coopta-
tus & receptus fuerat: idque eam ob-
rem, ut ne facilè ea quæ Sacerdoti-
bus Sancta esse debebant, in vulgus
spargerentur, cum à vulgo debitè ap-
prehendi nequeant. Igitur in ho-
rum

rum sapientum monumentis studi-
um sapientiæ nemo fundare debet,
præsertim quia ista scripta funda-
mento sapientiæ superstructa sunt.
Hoc volo: Quodcunque sapientiæ
fundamento innititur, in hoc sapi-
entia fundari non debet. Cum ergo
sapientum libri fundamento sapi-
entiæ nitantur, in iis fundamen-
tum sapientiæ solidum collocan-
dum esse quis concedat? Per plures
hoc tempore homines sunt, qui uni
certo auctori legendo & meditando
ita incumbunt, ut non tantum om-
nia ipsius dicta intelligere, sed etiam
alios in admirationem ejus auctoris
rapere de industria moliantur: Hi
autem cum simii sint & suum inge-
nium alterius libidini, arbitrioque
mancipent, suos libros fundamento
sapientiæ destituunt. Excolendo
aliorum ingenia, sua inculta relin-
quunt, & quia sapientiæ fundamen-
tum nesciunt, intellectum in angu-
stos carceres constringunt, ut nihil
sapere se posse putent, nisi quod alii
sapue-

aperuerunt. Discite ergo, o studiosi,
veram Sapientiae triunius viam tri-
nam, & in adeo arctos & angustos
sapientiae cancellos non abduce-
mini.

C A P. III.

IN LIBRIS DIABOLICIS

*Et superstitiosis Sapientiae fundamen-
tum non esse collocandum, ac proinde
eos non esse viam, quae Sapientia ve-
ra genuinum fundamentum
indicet.*

Libri superstitiosi oriuntur ab i-
is, qui in solida Sapientia nihil
profecerunt. Diabolici autem à
Diabolo, qui est pater mendacii &
in veritate non stetit. Verè ergo sa-
pientes fieri nequeunt, qui libros Di-
abolicos diligenter legunt, e, g, eos,
qui conjurationes spirituum cum no-
minis tetragrammati detestando,
abusu continent, superstitiosas, ma-
lasq; artes ad amorem venereum,
ad aucupandam principum grati-
am & ad divitias, aliasq; mundi de-
licias

licias consequendas docent, atque hominem à pietatis genuino exercitio longè avocant. Diabolus omnium spiritualium tenebrarum & veræ stultitiæ fons, non patitur eos qui diabolicos libros de industria legunt, à sapientia proficere: Libris enim istiusmodi veluti laqueis lectores & cultores suos in nequitia detinet, ne sapientiæ lux affulgere ipsis possit. Caveant ergo omnes sincerioris philosophiæ fideles amatores, ut spiritus familiares, quorum ductu informantur & erudiantur, sibi, mediante conjuratione asciscant vel, conjuratos ab aliis emant. Sapientiam veram docere non possunt; quia eam non habent. Lux Sapientiæ adeo eminens & fulgida est, ut malorum spirituum castra subire nequeat: Nulla enim communio lucis & tenebrarum in excellenti gradu existentium. Libris Diabolicis etiam annumerantur libri scommatum plenissimi. Plurimi hoc tempore sibi laudi ducunt, quando in verè literatos invehuntur, eorum scripta convitiis

proscindunt & petulanter carpunt,
quamvis ea non perlegerint, nec sen-
tentiam eorum probè perceperint. Mo-
ni isti, quia virtutis fama inclaresce-
re non possunt, aliorum famam
splendidam maledicendo infringe-
re & obtundere frivole attentant,
quod consequi ipsi non audent,
in aliis reprehendunt, ne nominis
celebritate vinci videantur. Mise-
randum est, quod sapientes haberi
velint ex oris sui malignitate, cum in
malignam animam sapientia nunquam
intret. Immodestia Sapientiae viam
occludit, quam modestia aperit.

C A P. IV.

*Viam qua ad solidum Sapientia Fun-
damentum ducat, esse triunam.*

DEus triunus est: Est Deus pa-
ter, Deus filius, Deus Spiritus
Sanctus. Homo triunus est: Constat
enim ex corpore, spiritu & anima.
Magna sapientum triuna est: Ejus
enim principales colores in operati-
one philosophica appaerentes sunt tres
Nigredo

Nigredo, albedo & rubedo: Constat
etiam ex tribus hypostaticis princi-
piis, ex sale nimirum, sulphure &
Mercurio. Omnia etiam cogno-
scuntur, quando D E U S, homo &
Magnesia Philosophorum cogno-
scuntur. Præterea quicquid de ve-
ræ Sapientiæ ratione est, cum Sacris
litteris macrocosmo & microcosmo
concordare debere manifestum est,
& à Sapiente non negabitur. Id
quod solidum demonstrat Sapien-
tiæ fundamentum, est veluti men-
sura & Cynosura, ad quam alia scri-
pta dictave sapientiam docentia
mensurantur: Omnia autem homi-
num scripta & dicta censerī & judi-
cari debent ex S. S. scriptura, Majori
& minori mundo. Quare via, qua
ad solidum Sapientiæ fundamen-
tum homo pervenire potest, rectè
trina appellatur. Una etiam est,
quia quæ in triplici ista via propo-
nuntur mirabili harmonia inter se
consentiunt & ad sui correspon-
dentem explicationem inter se magnū
habent

habent momentum. Ne dixeris;
Macrocosmum & microcosmum,
non esse viam ad Sapientiæ solidum
fundamentum deducentem, quia
illa sunt, quæ cognosci debent: Ipsa
enim Sapiencia ipsis divinitus inspi-
rata & adeò profundè infixæ est, ut se
lucem ad semetipsam universis ho-
minibus offerat. Quomodo autem
hoc fiat, ex sequentibus patefcet.

C A P. V.

*S. S. scripturam esse viam, quæ ad so-
lidum Sapientiæ fundamentum stu-
diosos veritatis perdu-
cat.*

UT in naturâ, viva DEI imagi-
ne, Sapiencia ita se conspicien-
dam exhibet, ut de veritatis cogni-
tione certum reddat hominem: Ita
etiam eadem Sapiencia in sacra scri-
ptura se ostendit, ut inde simili rati-
one homo de veritate rerum certus
reddatur, ac sic solidum Sapientiæ
fundamentum in sacris literis po-
nat. A DEo quod provenit, certif-
simam

firmam viam ad Sapientiam assequē-
dam demonstrat: DEus enim Sapi-
entia ipsa est & luce sua viam illu-
minat, quæ ad veram deducit Sapi-
entiam. Homo diligenter scriptu-
ram legens & considerans acquie-
scit in ea, quando eam intelligit, nec
dubitatur de eius veritate: Alia autem
scripta legeus & intelligens non ac-
quiescit in iis, sed eorum veritatem
ad lumen gratiæ & lumen naturæ
metitur: Unde Saniores rectè sta-
tuunt ex unis S. literis de omnium
Theologorum scriptis iudicandum
esse. Quis ergo negaverit S. S. scri-
pturam esse viam ad solidum Sapi-
entiæ fundamentum deducentem?
Quando controversia est de re ali-
qua, & eius rei probatio ex S. S. scri-
ptura liquidò haberi potest, homo
credit illam rem esse veram, quia S.
S. scriptura eam clarè docet: con-
trà si ex aliis scriptis aliquid proba-
tur, illud homo non credit, quia in
iis proponitur & exponitur; sed quia
cum lumine naturæ & gratiæ con-
cor-

cordat. In S. scriptura quædam
apertè, quædam tectè docentur :
idq; eo fine, ut primum nosmet ip-
sos exerceamus in apertis, quò per a-
perta in tectorum apprehensionem
provehamur. Lege, cognitis aper-
tis, obscurè dicta, meditare, relege,
idque aliquoties; innata scripturæ
lux intellectui tuo demet nebulas
rerum profundarum cognitionem
impedientes, ut ea, quæ aliis intel-
lectu difficilia habètur facilè pervi-
dere et cognoscere possis. Nunquam
tam è ad scripturæ lectionem & me-
ditationem te accingito, nisi ad
DEUM preces præmiseris, atque
ab eo spiritum intelligentiæ impe-
traveris : Quo factò, lege attentè :
Si quid sub initium difficile vide-
tur, vel sub notione falsi apparet,
illud ne judica, sed præteri, atque
ad alia progredere; cogitans non-
dum adesse horam, qua illud in-
telligere debeas. Aliâ tamen ho-
râ repetere, idque cum attentione, i

Ambrosius.
Diversa sunt
Scripturarū
fluenta. Ha-
bes quod pri-
mū bibas,
habes quod
secundū,
habes quod
postremū.

Si tum nondum intelligis, etiam
acquiescito, & ne judicato. Perlege
alia, & serio statue, nondum venis-
so horam, qua DEus tibi animum
aperire velit ad istud intelligendū.
DEus vult omnia ut sunt certo con-
stituta ordine, ita etiam certo co-
gnosci ordine: Quando ergo adhuc
nobis ignota sunt ea, quæ prius co-
gnosci debebant posteriora, etiam si
velimus, intelligere non possumus.
Repetetamen nihilominus frequē-
tissimè cum summa attentione in
loco solitario id, quod tibi aliās in-
tellectu difficile fuit, tandem pro-
fundior ejus sensus & ratio tibi in-
mentem veniet. Cave etiam ne lu-
cem ab hominibus mutueris & S. S.
scripturæ inferas: Tu enim hac via
tibi obstaculo eris, ne scripturæ lux
infusa in tuo intellectu operari & ad
profundioris Sapientiæ cognitio-
nem te evehere possit. Principiis ho-
minum imbutus adeo inflatur scien-
tia, ut etiam ad ea scripturam Sa-
eram metiri auit. Temerarius hic
aulus

infusus est: Dei enim Sapiencia se in e-
ius cor non deponit, qui humana sa-
pientia intumescit. Plenus non ad-
mittit aliquid aliud in se. Nos o-
portet fieri infantes, hoc est nihil
scire, si ex regno Dei & abyssu mise-
ricordiae Divinae Thesauros Sapi-
entiae hauriri volumus. Qui à S. S.
scriptura ad aliorum commentaria
abit, DEum sui libri interpretem,
non exspectat, sed eum impotentiae
arguit, quasi non posset sine homi-
num luce, lucem intellectui ingene-
rare. Commentaria ante S. S. scri-
pturam lecta animo sinistras opini-
ones frequentissime suggerunt; Qui-
bus ubi homo diutius immoratur,
assentitur, atq; ad eas dicta scriptu-
rae misere contorquet. Depravatio
scripturae haec est. At ais, multa esse
obscura in S. literis, quae intelligi de-
beant, & cum impossibile sit ut pro-
pria lectionis industria omnia ob-
scura dilucide apprehendantur, ali-
orum commentariis opus esse. R.
An tu putas, te omnia obscura, quae

in sacris literis habentur, scire debe-
re. ? An tuum est tibi ea præscribe-
re, quæ discere debeas ? **DEUS**
vult tibi multa manere incognita
ut tuam ipsius agnoscas imperfecti-
onem. Quemadmodum homo
omnia, quæ in natura & universo
hoc mundo latent, investigare non
tenetur: sufficit enim ut quædam
expiscetur, reliquaq; aliis indagan-
da relinquat. Ita quoq; nullus tene-
tur omnia, quæ in sacris literis ob-
scura sunt, intelligere: Quis enim
profunditatem Sapientiæ Divinæ
exhaustire posset. ? Præstat **DEUM**
expectare interpretantem, & ad
tempus aliquid ignorare, quàm hu-
manam Sapientiam pro divina re-
portare: Quod aliàs facillè fieri pos-
set, si ex hominum Commentariis
S. S. Scripturæ lux inferretur. Si
DEUS voluisset clariùs mysteria sua
per literam nobis patere, utiq; dilu-
cidiùs viri **DEI** ea scripssissent. In
sudore vultus tui comedes panem ;
ait **DEUS** Adamo. Obscurè ergo
myste-

myſteria proponantur, ut iis evol-
rendis inſudemus, & invigilemus.
DEUS Anne igitur commentaria ſunt nul-
lius uſus? Hoc nunquam dicere ve-
rim: ſunt enim diligentis medita-
tionis & lectionis divinarum lite-
rarum (niſi ex aliorum hominum
interpretatione & immaturo judi-
cio profluxerint) ſigna, lectoris, qui
in S. literis fundamentum poſuit,
animum Sapietia adaugent, atq; ad
imitandum eam diligentia nos ſti-
mulant. Hodie verò plurimi com-
mentaria ſcribunt ex commetariis,
alter alterum inſtar ſimiarum imi-
tatur; Nemo autem ſcribat libros,
qui ex aliorum libris ea, quæ ſcribit,
ſcribit, & viâ ſapietia triunã nescit.
Furatur iſte Sapientiam aliis, quam
ipſe non habet. Aliorum Sapientia
qui tantum ſapit, deſipit, & ſua ſtul-
titiã alienis plumis contegit. Non
ex fonte puro, ſed ex rivulis turbidis
bibit ille, & ſic in erroribus ſuis tan-
dem moritur. Stultum eſt præferre a-
liena propriis, & aliorum ſudorẽ ſibi
tribuere. Tu verò qui ad ſolidam &

sinceram adspiras Sapientiam, de
limpidissima fontis aqua bibe, & si-
tim restingues lætabundus. Poteris
tamen, postquam fundamentum
sapientiæ in S. S. scriptura absq; ali-
orum commentariis posueris, com-
mentaria aliorum legere, ut sapien-
tiæ conformitatem in diversissimis
videas, & magis magisque in vera sa-
pientia inde confirmeris. Lege S. S.
scripturam, & id præsta non inci-
denter, ut tibi eam familiarem red-
das, priusquam ex ea iudicium de
aliis rebus formaveris: Ex scriptis e-
nim, quæ incidenter leguntur, raro
verum iudicium de rebus fertur, cum
facile possit fieri ut ea, dum inciden-
ter leguntur, debite non intelligan-
tur. Scripta quæ bene intelligi de-
bent, bene & diligentissime legi de-
bent, ut eorum ratio, intellectui e-
videnter se ostendat. Bone DEUS
quam immensus est istorum nume-
rus, qui ubi ex præceptorum suorum
informatione & sua catechesi ali-
quid falsum esse didicerunt, coram
po-

populo prætendant, se ex Sacris li-
teris scire, illud esse falsum; ubi ta-
men rarissimè S. Biblia in manus sú-
pserunt, atq; Dei sapiētiā in iis nobis
manifestatam vix unquam cum at-
tenta devotione seriò meditati fue-
runt. Appello conscientiam eorum
omnium, qui hodie ante trigesimū
ætatis annum ad Ecclesiasticum mi-
nisterium promoventur. Hujus au-
tem mali causa rectè imputatur
Theologis, qui candidatos ministe-
rii potius ex Catechesibus & locis
hominum communibus, quàm ex
S. Scriptura examinare solent. For-
san & hoc nobis argumento esse po-
test, quod ipsi examinatores de ve-
ro S. S. scripturæ nucleo vix aliquid
gustaverint: DEUS, qui corda novit,
tandem è somno evigilabit, atq; et-
iam illis, nisi maturè resipiscant, et-
iam illud bonū, quo jam fruuntur,
subtrahet. Pænitentiam agite & di-
ligentiùs versate Scripturam Sacrá,
qui DEI ministri esse cupitis. Cæte-
rùm lege S. scripturam, Theophile

C 5

ita

ita ut Harmoniam rerum divinarū
& humanarum, cælestium & terre-
strium, gratiæ & naturæ, exinde ob-
serves. Quam si agnoveris & videris,
benè legisti. Omnia tandem in una
convenient & persistent natura: ut
& ex una essentia omnia sumpserunt
originē. Quies nullibi nisi in unitate.

C A P. VI.

*Macrocosmum esse etiam viam, quæ ad
solidum sapientiæ fundamentū veri-
tatis studiosos perducatur.*

IN macrocosmo sunt lux & tene-
bræ. Quod tenebræ occultant,
illud lux in apicem sistit & manife-
stat: idq; certo ordine, ut unum post
aliud insensum & rationem incurrat:
etsi ergo res ipsæ macrocosmū con-
stituentes cognosci debent, tamen,
in se habent lucem, quæ viam ad sui
cognitionem illustrent & conspici-
endam offerunt. In mundo Sol est,
qui hæc inferiora suo lumine illu-
strat, ut à nobis videri possint. Quæ-
dam in natura manifesta sunt, quæ-
dam occulta. In apertorū considera-
tione

one meditari disce, & plurima ex
occultoribus ad eundem modum ri-
naberis. Meditatio est veluti instru-
mentū, quo tenebræ rerum spiritua-
liter discutiuntur, & lux earum ab-
condita intellectui sistitur. Quæ oc-
cultæ sunt, corporeis vinculis vel di-
stantiâ longâ teguntur, ne in sensu &
rationem sub primum intuitū & co-
natū incurrant. Si diligenter res me-
ditatus fueris, earū operationes stu-
diosè observaveris, & operationum
mirabilem harmoniâ notaveris, te
aliquid in vera sapientia profecisse in
tuo ipsius animo revera persentisces.
In primis autē generationes, conser-
vationes & destructiones rerū confi-
derabis, idq; non ex librorū, vel Ma-
gistrorum vivorum informatione,
sed occasione nactus ex tuo ipsius in-
tuitu & sensuali observatione. Et quia
facile animum confusa multarū re-
rum cognitio sub initium perturbat,
meditaberis primum rem unā intel-
lectu facilem, e.g. triticum, & in eo
ejus originē seminalē, & seminis, è quo
aliud

aliud triticum nascitur, locum seu
matricem convenientem 3. aquam,
qua in sua matrice ad germinis pro-
ductionem resolvitur 4. Caloris so-
laris vel alterius analogi interventu
aquam matrici seu terræ inclusam
subtiliari & in corpus seminis intro-
mitti 5. Corpus seminale inde pro-
pter suam angustiam non esse capax
tanti humoris, quantum Archæus
corporis seminalis rationi inclusus
in se trahere possit 6. ac proinde cor-
pus seminale corrumpi, resolvi & ex
eo protrudi germen. 7. Germen il-
lud nutriri eadem aqua 8. Inde sti-
pulam & in stipula nodos, & supra
stipulam Aristas, è quibus flores, &
post alius fructus triticeus prodeat,
fieri 9. Nodos esse vasa, per quæ at-
tractus humor magis magisque subli-
metur & purificetur, ut tandem ex
purissimo liquore aliud triticum cū
foenore enascatur. Quæ omnia si
probè intellexeris, tecum pondera-
bis, etiamnum esse aliquid sublimi-
us in corpore seminali, in germine,
in

floribus, & in fructu, illudq; du-
o procul admirandam conveni-
entiam habere cum cœlo, quia cœli
calorem in se amplectitur, ei se unit,
in eo delicias & vitæ suæ vigorem
habet, atq; pro constitutione superi-
orum suas virtutes mirabiliter di-
ponit. Hisce ita probè apud repon-
deratis & cognitis, alia semina in
considerationem trahes, & harmo-
niam convenientem notabis. Po-
teà quando conservari & destrui res
vides, sollicitè in causas conserva-
tionis & destructionis inquire. Non
omnia primo intuitu in mentem
venient, prout se intus & foris ha-
bent. Unum tamen post alterum
ita intellectui tuo se patefaciet, ut
brevis non exiguum progressum in
Sapientia sis reipsa in te ipso depre-
hensurus. Tandem ubi ita medita-
ri & tuo Marte, id est, absq; aliorum
hominum institutione naturam ri-
mari didicisti, genius tuus, quem
tanquam Archæum animo tuo in-
situm habes, quiescere non potest,
sed

sed te de die in diem ad occultio-
rum rerum, profundiorum & ex-
quisitiorum apprehensionem insti-
gabit, & quia in motu est, tibi quoti-
diè nova inventa suggeret, & tuum in
Sapientia progressum adeo ampli-
ficabit, ut tandem indubitatè intelli-
gas, opinionum humanarum studi-
osos in errores & labyrinthum ruc-
re, à veritatis via longè abesse, & vi-
am hanc, quam incedis, esse verissi-
mam, & solatii plenissimam. Dum
alium etiam vera dicentem audio,
primò in ipsius sermonem intendo,
& deinceps in rem, quæ sermone ex-
primitur. Jam verò qui macrocos-
mum ipsum sine sermonis implica-
tione intuetur, directè ad scopum
collineat & citiùs assequitur verita-
tem. Nudum faciliùs cognosci-
tur, quàm aliquo modo tectum.
Certior ergò reddor in veritatis co-
gnitione, quando naturam absque
verborum annexione contemplor,
quàm si mihi sermonis obscuritate
detento, verba ipsa negotium facef-
ferint,

erint, priusquam ipsam rem atti-
gerim, quæ tamen intelligi neque-
at in sermone, nisi ad macrosum
redeam & eius veritatem medi-
tando deprehendam, Tu verò in hac
meditatione pedem figere noli: Scis
ignem esse omnium corporum pro-
batorem, examinatorem & resolu-
torem. Ad naturæ modum & cur-
sum igne utere, ac convenientibus
menstruis resolve, quicquid resolve-
re cupis, tum miracula corporum
tenebris involuta prodibunt, & tu-
us animus sapientia ineffabili opple-
bitur. Ea menstrua convenien-
tia sunt, quæ cuique rei in suo regno
respondent, h. e. quæ sub eodem
regno, cui corpus resolvendum
subjacet, militant. Animalia a-
nimalibus, vegetabilia vegetabili-
bus, & mineralia mineralibus men-
struis præparanda & solvenda
sunt. Quod si processus ab a-
liis scriptos abjeceris, & ad natu-
ræ imitationem operatus fueris,
vide-

Ex libris col-
ligere, quæ
prodiderint
autores lon-
gè est pericu-
losissimum.
Rerum ipsa-
rum cogni-
tio vera è re-
bus ipsis est.
Seal. exere,
104.

videbis ea, quæ vulgaribus Philoſo-
phis, ſeu Athenienſibus Magiſtris &
filiis mundi prorsus ſunt ignota &
gaudebis. Baſilius Valentinus chy-
miæ ſubſidio 1. Vegetabilia & 2. Mi-
neralia expiſcatus eſt; vide præfati-
onem ejus de magno antiquorum
lapide. Eum ordinem & tu obſer-
vabis. A facilioribus exordiendum.
Priusquam autem meditaris & ope-
raris ad ignem, DEum fatiga preci-
bus, ut tuæ meditationis & operati-
onis dux eſſe velit; ſine DEo ex Ma-
crocoſmo nihil ſolidi cognoſces;
Tu enim & Macrocoſmus in DEO
eſtis & perſiſtis. Ardenter ita invo-
cato DEo, nulla præteribit hora, in
qua genius tibi divinitus inſitus ali-
quid ſingulare non ſit revelaturus.
Vide tamen ne meditationem tuam
nimis diu intendas; ut intellectui
tuo inde vi inferatur. Sic enim in
delirium facile incidereſ. Quod ca-
ret alterna requie durabile non eſt.
Hanc viam è macrocoſmo petitam
eſſe veram, certamq; atq; ad ſapientia

ia solidum fundamentum perdu-
ere velex eo constat, quod omni-
um sapientum scripta ad eam velu-
i ad lydium lapidem revocentur &
examinentur. Si quid ab iis dictum
uerit ab hac via avium, illud rejici-
tur: quod verò ei respondet, & in o-
mnibus convenit, approbatur & ve-
rum esse judicatur. Res ipsæ per suas
operationes se produnt. Si intelle-
ctum ocio torpescere permittes, ad
naturæ operationes non attendes,
nec id, quod notatu dignum erit, ob-
servabis. Diligentia meditationum,
operationum & inquisitionum in-
operationes, animum adeo vigilem
& alacrem conservabit, ut etiam
profundissima facili labore perscru-
tari inde queat. Quicquid in ma-
crocosmo sparsim diffusum est, illud in
microcosmo collectum est: confer
ergo macrocosmum cum micro-
cosmo, & cognosces inde tanquam
ex explicito hominem, tanquam a-
liquid implicitum. In minerali re-
gno quære salvatorem mineralium

D

&

& medicinam illam universalem.
Cum ejus materia & operatio-
nibus confer ea, quæ in sacris lito-
ris & in te ipso tibi offeruntur; Ab
hac in profundissimam terrestrium,
cœlestium & supercœlestium essen-
tiarum cognitionem devenies & læ-
taberis: Nactus hanc perfectionem
in rerum cognitione oculos apertos
habebis, quibus, non tantum Phi-
losophiæ vulgaris vanitatem, sed et-
iam omnem hujus mundi miseriā,
restorationem & renovationem,
absq; errore intuearis, ut ex hac vita
emigrare desideres, atq; ad perfecti-
orem vitam in uno solo Deo confi-
sistentem immensis ex sinceri cordis
abyssu promanantibus suspiriis ad-
spires. O Iesu, qui mihi hanc viam ex
singulari tua beneficentia monstra-
sti, miserere etiam mei, & animum
meum magis magisq; illustra, ut tu-
um hoc beneficium, tum agnoscam,
tum pro eo tibi perpetuas gratias ex
intimo mei cordis recessu agam, &
egentibus vicissim benefaciam, tan-
dem-

icq; multitudinis ergastulo libera-
tus, tecum apud Patrem tuum in unitate
habitare. Amen. Jesu Christe: Amen.

C A P. VII.

*Microcosmum esse etiam viam, quæ ad
solidum Sapientia fundamentum
veritatis Studiosos deducat.*

IN microcosmo seu homine no-
bilissima substantia est, quæ ani-
ma dicitur, illaq; omnium rerum, quæ
ab universo hoc mundo continetur,
vires & virtutes, eminenter in se com-
plectitur, ita ut etiam inde earum spe-
cies sibi ingenerare possit, nisi à cor-
poris molestia & impuritate impe-
diatur, ne istas species fingere & cõ-
cipere valeat. Omnium ergo rerum
cognitio ab anima est, seu potius ab
ipsius genio, tanquam ab insita luce.
Sed cum tenebræ etiã admixtæ sint
ex corporis unitione, lux insita non
potest prodire, ac proinde certam
viam ad sapientiæ fundamentum
monstrare nequit, nisi tenebræ di-
scutiantur, & tenebris pulsas, lux do-
minium habeat. Lux è tenebris

D ij

clue

En viam ha-
bes, qua se-
rectiores
Philosophi e
se ipsis rerū
externarum
naturam ex-
plorant!

Moto liquo-
re invite ad
producen-
dos flores,
mouentur et
iam & per-
turbantur vi-
na antiqua
doliis contā-
ta. Ad eā mo-
tu vitis vitis

eluctata in homine conscientiam
veritati è macrocosmo & S. S. scri-
ptura oblata assentientem & à falsi-
tate forinsecus adducta dissentien-
tem parit. E tenebris verò lux ani-
mæ eluctatur pietate & introversio-
ne; illā, quia impia anima Sapien-
tiæ rivulo non irrigatur: hac, quia
radii animæ ubi à circumferentia in
centrum revocantur, in se coeunt,
lucem dispersam in centro colli-
gunt, & animam adeò illustrant, ut
universi hujus imaginem in seipsa
videat, contempletur, & in ea ima-
gine omnia, quibus intenta est, faci-
lè rimetur. Anima hominis est quin-
ta hujus mundi essentia, omnium
virtutum, quæ alicubi distinctè se
exerunt, essentialia puncta & semi-
narias rationes admiranda unione
in se habens; ut vel hinc veras spe-
cies rerum verè existentium & se mo-
ventium, atq; motu suo spiritualiter
se in anima hominis repræsentanti-
um, quando ad eum motum atten-
ta est, fingere apta sit, & ea ratione
essen-

essentias diversissimarum creatu-
rarum absque sensuali cogni-
tione exquisitè apprehendat.

ofo spiritua
liter imagi-
natio vitis
percellitur.

Hæc via est secretissima atque solis
philosophis sincerioribus cognita,
&, præmissis ardentibus ad DEum
precibus, ab homine vitam suam ad
legem Dei in sacris literis perscriptâ
componente initur, & observatur.

Requiritur omnium sensationum
exteriorum actualis sine somno
oblivio & animi puritas. Ubi erant
discipuli congregati propter me-
tum iudæorum, foribus clausis ve-
nit Jesus, & stans in medio dixit eis;
Pax vobis: Joan. 20. v. 19. Sensuum
clauduntur fores & in medio aderit
Sapientia. Si quis hanc viam probè
noverit, in se omnia, quæ sunt in u-
niverso, quoad virtutes essentielles,
reverâ esse deprehendit, & harmo-
niam in creaturis admirandam a-
gnoscat. Hoc ex abundanti addo.
Quicumq; eò, mediantibus precibus,
pervenerit, ut etiam sensationibus
sine somno sepultis, species rerum

En viam se-
cretissimam
habes, qua ille

D 3

distin-

luminatissi-
mi Theoso-
phi Deo im-
perscrutabi-
liter uniti in
eo omnia co-
gnoscent :
quia ipse est
omnia in o-
mnibus.

distinctas obliviscatur, & creaturarū
cognitionem omnem abjiciat, à
multitudine in unitatem devolvi-
tur & in uno DEO acquiescit, cujus
dulcedine & imperscrutabili luce a-
deo reficitur, ut in unitatem DEI
absorptus ad imperfectarum crea-
turarū domicilia nunquam reverti
cupiat. Sed credite, in hac vita hu-
jusmodi raptus in Theosophis ut
plurimum esse momentaneos, nisi
quis DEO se totum voverit, atque
aliquoties magna cum mora tantæ
oblivioni & Θεω̃ indulserit : Tum
enim ejus anima, imò & corpus ex-
terius fulgore obducitur, ut, si DE-
US permetteret hominem tanto
fulgore circumfusus in conspe-
ctum hominum prodire, vulgus e-
jus intuitum ferre nequeat : Non a-
liter ac divino Mosis accidit, cujus a-
spectum, postquam in Divino col-
loquio & sacrosancto silentio ad
quadraginta dies permanerat, Isra-
elitæ ferre non poterant. Amor
meus, quo in vos feror, amicissimi
disci-

discipuli, hæc ita ex mei cordis inti-
mo meditullio exorsit. Si ea intel-
ligere non potestis, tamen ne judi-
cate, nec rejicite, sed acquiescite.
DEUS, si sinceri estis, & eum ar-
denter absque intermissione in spi-
ritu & veritate invocabitis, tandem
vobis suam ostendet gratiam. Con-
temptori ad veram sapientiam nul-
lus conceditur aditus.

C A P. VIII.

QUISNAM DIGNUS HA-
beatur, qui viam Sapientiae triumam
jam à me candidè ostensam ca-
possere debeat?

Non sufficit scire viam ad soli-
dum veræ Sapientiae funda-
mentum deducentem, sed etiam de-
cet cognoscere modum, quo alicui
ea via ab incunte ætate monstrari,
amor in eam ingenerari, & tandem
ille in Sanctuarium Sapientiae in-
tromitti debeat. Si illegitimo or-
dine imprudenter via nostra tri-

D 4

una

[a] Eccles.
Sal c. 12 v. 1,
[b] Prov. 3, 34

una in imitationem ab aliquo tra-
hitur, ille vix aliquid addiscet. Qua-
re attendite & audite, quisnam di-
gnus habeatur, qui viam Sapientiae
triunam supra à me explicatam de-
bitè eat! Dignus ergò ille est, qui per-
fectos sensus in corpore gerit, [a] pie-
tati à teneris assuescit, vitam sedatā
& modestam ubiq; agit, est impiger,
Eccles. Sal. 10. v. 10. in mathema-
ticis diligenter se exercuit, in iisdem
(non in frivolis & futilibus rebus,
vanisque Philosophastrorum alter-
cationibus) meditari didicit, lingu-
arum Graecę, Hebraicę & latinę co-
gnitionem adeptus est, adolescen-
tiæ annos unā cum præiudicio post-
se reliquit, atq; sic, si forsan aliquid
de litigantium Philosophia didicit,
illud reverā dedidicit, ne eius princi-
piis imprægnatus secundum ea judi-
care incipiat, priusquam judicare
aptus fuerit. Hic homo in via sapi-
entiae triuna absq; omnibus aliis li-
bris plus una hora proficiet, quā
alius per totius vitæ cursum, & Deo,
cui

aliqui magis confidit, quàm suis viri-
bus, semper, quando per viam Sapi-
entiae triumam aliquid exploravit,
in corde suo ager gratias.

C A P. IX.

QUO FINE SAPIENTUM libri sint legendi, & quan- do ?

AUdivisti suprà ad fundamen-
tum sapientiae solidum dedu-
ci hominem per viam illam triunā
expositam, & excludi etiam Sapien-
tum libros; sed tamen velim ne in-
de tibi persuadeas, te in Sapiendum
monumentis evolvendis & perle-
gendis omnino versari non debere:
Non enim hæc mea intentio est:
quippe Sapientes, quæ de Sapientia
in suis libris commentantur, non
frustrà commentantur. Per scripta
sua etiam prodesse volunt. Nolunt
tamen ab aliis in Sapiendum libris
fundamentum Sapientiae solidum
poni & rivulos præferri fonti. Tu
ergò, qui adspiras ad veram Sapien-

D S tiam,

tiam, viam Sapientiae triunam se-
quere, & in ea fundamentum Sapi-
entiae pone. Iacto fundamento, le-
ge scripta Sapientum, ut ex iis colū-
nas Sapientiae ad sapientis Amphi-
theatri extructionem necessarias ti-
bi pares, in iis occasionem ad myste-
riorum profundiorē considerati-
onē nanciscaris, cōformitatem tuo-
rum cogitatorū cum illorū scriptis
intuearis, magis magisque in consci-
entia tua de veritate confirmēris, &
tandem te in verorum sapientum
ordinem receptum esse in Sacrosan-
cto silentio latus agnoscendo expe-
riaris.

CONCLUSIO.

Viam Sapientiae triunam, Audi-
tores, ita explicavi idq; pro ra-
tio netaienti divinitus mihi dati.
Nullus dubito quin si eam viam ob-
servaveritis, Scholam Sapientiae sitis
ingressuri, ibi magnalia ejus contem-
platuri, & bona infinita inde reporta-
turi. Hoc tamen pro clausula notate,
quod nondum in Scholam Sapientiae

gressi sitis, si sine cruce vixistis, & a-
more magis in temporalia & caduca
na, quàm in aeterna & incorrupti-
lia ferimini. Mundanae deliciae per
crucem vobis atterenda sunt, si divi-
na Sapientia nectare irrigari & reso-
llari cupitis. Mundanorum memor
in vina vix sapiet.

Dixi.

DEO Triuni laus & gloria in
æternum, Amen.

onam itineris perplexi partem con-
fecit, qui viam rectam probe
didicit.

ADMONITIO

AD

LECTOREM.

QUatuor forsan sunt, Bene-
vole Lector, quæ ubi in hoc
tractatu displicent 1. quod com-
mendaverim Scripta Paracelsi &
Veigelii 2. Quod Sapientiæ studi-
um ad legendos libros, hodierno-
um Theologorum, controversias
religionis tractantiû, nō adhorter 3.
quod

quod scripta ethnicorum abjicienda & Scholis exterminanda esse velim. & 4. quod in capite 7. Enthusiasmum in mundum reducere videar. Ad primum quod attinet scias me nolle alicui omnia scripta quæ hodie sub nomine Paracelsi & Weigeli in lucem emittuntur, commendare: Multi enim libri, qui dictis viris tribuuntur, sunt suppositi & non exiguos errores pro veritate venditant, ita ut inde facile aliqui qui eas ante in veris libris jactum Sapientiæ fundamentum leget, in vagis & instabiles opiniones abstrahantur & phantasticis figmentis Theologiam quandam extra sacrarum litterarum profundam meditationem in aliorum hominum perniciem fingat. Do ergo tibi hoc sanam consilium, ut ne Paracellum & Weigelium legere incipias, priusquam in S. S. Scriptura, Macrocosmo & microcosmo solidum Sapientiæ fundamentum posueris. Hoc posito dictorum virorum monumenta le-

ge

corum ab
minanda
capit. 2. E
lum reduc
quod am
nia scrip
Paracelsi
tius con
libri, qui
et suppo
pro verit
le aiqu
et aucto
eget in
abstrah
nis Theo
erant lib
elatione
et aucto
tiam con
& Weig
quoniam
do & mi
arie fuit
e polio
venera
89

s, & initia tuæ Sapientiæ medita-
one scriptorum eorum longè am-
ficabis; nec tibi erit periculum ex
ppositiis libris: Non difficulter ho-
m enim errores ex veris libris di-
nosces & venerum à salubri, ma-
m à bono, falsum à vero separabis.
e secundo habeas, ex controver-
arum Theologicarum strenua tra-
tatione homines magis opinionari-
us & inani eruditionis persuasione,
uàm solido pietatis studio impleri,
et inde fieri ut controversiarum ea-
rum discussiones & ventilationes
luris æstimemus, quam pietatem
ipsam, sine qua tamen nullus homo
erè Christianus est. Deducendi sunt
homines primum ad caritatis exer-
citiū, ut desinat mutuæ condem-
nationis, temerariiq; iudicii ma-
eficiū. Monstres mihi fidem tuam
per opera caritatis, & credam tibi
aliorum errores refutanti. Errores
refellendos esse novimus: sed cari-
tas, (non contradicendi studium)
errantem facile in veram abducit vi-
am.

am. Caritatis vinculo si quem coniunxeris, eius cor modeste à vanis opinionibus liberabis. Hosti si bene facere didicisti, Christi præceptum observabis, & aberrantem facile in tuam sententiam permovebis. Hodiè magis requiritur vitæ, quam opinionum emendatio, ex hac enim quando sine caritate est, dissidia, ex illa pax & concordia liquidò scaturiunt. Ad tertium ut respondeam, ethnicorum scripta ex Scholis non exturbo, nisi quatenus in iis de fundamento sapientiæ studiosa juvenus informatur, & prius ex Gentiliū commentis, quam ex S.S. scriptura, Macro & Microcosmo veræ Sapientiæ seminaria haurit. Primum volue, revolve S.S. scripturam, Macro & Microcosmum, & ex iis apprehende sapientiã. Quæ acquisita, in proclivi tibi postea erit, proba ab improbis, in ethnicis Scriptoribus discernere.

Ad prostrenum aio, Enthusiasmum vocem in magnum abusum esse habere. Et tunc

dictam; nā propriè significat divi-
nam rerum in raptu inspirationem;
nā qui negat, verè Christianus non
est. Ipse D. Paulus in tertium cœlum
elevator legitur: & Prophetæ ea, quæ
populo annunciarunt & prædicave-
runt, per inspirationē divinam ha-
buerunt. *Malim ego ad eandem faciē*
Te Pius Enthusiasta, quam Mataolo-
gus stolidus? impropriè autē Enthusi-
asmus dicitur diabolica inspiratio
vinæ revelationis pallio decorata,
cuius manifestum Dei verbum impij
sensu allatione impugnatur, noviq;
articuli fidei contra caritatem prox-
imi ad seditiones in populo excitan-
das, excogitantur. Qui tales sunt En-
thusiastæ, fanatici meritò habentur,
qui dignissimi sunt, qui a Magistratu
naturè compescantur. Hæc sunt,
quæ sub finem adhuc scire debuisti,
rector benevole, ne præcipites judi-
cium, priusquam me rectè intellex-
eris. Tu vale benè, cum candidis cā-
didè age, & me tui studiosissimum
avore tuo prosequere.

P. B.

P. B.

Veritate in scripturis sacris patefacta contentus, fuge curiosas de rebus divinis disceptationes. Non disputando Deus colitur, sed obsequio. Non est ita curiosa religio. Quid deliberas? quid agendi tempora disceptando transmittis, evocandus ex vita priusquam statueris aliquid? Quid altercanatio charitatem excludis? Sciendi via brevis est, agendi longa. Credis age. Cogita non exacturum ab te Deum quantum disputaveris sed quantum vixeris; hoc est quam pie, modeste, caste, leniter, patienter egeris. Si tam operose credendum est, quis tandem salvabitur. Eteum omnia scire volueris, quando illud facies, quod monet Dominus, Quisquis vult discipulus meus esse, abneget semetipsum & tollat crucem suam? Certe quum plurimum sciveris, vinceris à Diabolo.

Scriptura
ta contenta
no divini co
e disputata
equo. Ne
Quid de
tempora
ui, evocat
um statuer
candio cla
endi via
a. Credo
turum ab
putaver
locu est
de. lenite
nerore cen
aditum
viquan
vener Do
discipulu
virgine
Certi
veru,
do.

